

四庫全書

史部

欽定四庫全書

史部

欽定八旗通志卷

一百六十七至
一百六十八

欽定四庫全書

欽定八旗通志卷一百六十七

人物志四十七

大臣傳三十三

滿洲鑲白旗一

吉思哈 愛松

伊遜 察哈喇

哈寧阿

齊爾格申 揚善

卜臣 棟阿賴

車克 珠瑪喇 鄂屯 錫

吉思哈 弟吉普喀達

吉思哈姓烏蘇世居瓦爾喀馮佳屯初臣於烏拉部見其貝勒不足事與弟吉普喀達來歸

太祖高皇帝並任佐領隸滿洲正白旗後改隸鑲白旗天命四年吉思哈從征明有功授三等輕車都尉世職六年以叅領率兵圍遼陽城立雲梯先登天聰八年

太宗文皇帝念其功晉世職二等輕車都尉是年同叅領武巴海征東海呼爾哈部俘獲男婦千五百有奇牲畜輜重無算九年同副都統巴奇蘭等征黑龍江收二千丁以歸晉一等輕車都尉崇德元年

太宗親征朝鮮聞明兵入鹺場遣吉思哈率兵躡其後擊敗之明兵遁二年正月大軍攻克朝鮮國都吉思

哈奉

命同理藩院叅政尼堪等率每旗甲士十人及科爾沁教漢奈曼扎魯特烏喇特諸外藩兵征瓦爾喀將出朝鮮境有朝鮮兵二萬分列營壘吉思哈率兵合諸軍進擊並設伏絕其去路斬其平壤巡撫殲數千人獲馬三千敵遁走山巔設柵拒守我軍圍之

三日敵衆遂降進略瓦爾喀即以所獲牲畜等物
分給外藩隨征將士遣之各還所部奏捷稱

吉累遷至吏部叅政三年四月卒以其子吉瞻襲職吉普
喀達亦以天命四年從征功授三等輕車都尉世
職六年任叅領隨大軍攻奉集堡明總兵李秉誠
赴援為我左翼四旗兵逐奔吉普喀達奮往追擊
直抵城壕中礮卒天聰八年贈二等輕車都尉子
瓜爾察襲

愛松古

愛松古姓納喇世居葉赫

太祖高皇帝天命四年來歸隸滿洲鑲白旗屢從征伐

太宗文皇帝崇德元年

命偕察漢喇嘛等赴明邊殺虎口互市尋復

遣往科爾沁調教漢奈曼扎魯特烏喇特諸部兵征明三

年七月初設理藩院以愛松古為副理事官十月

自歸化城導厄魯特部長墨爾根戴青來歸四年

詔率巴林烏喇特兵赴四子部追捕逃人愛松古至中途
潛歸論死

命從寬鞭百仍令供職六年隨大軍圍松山明總督洪承
疇遣其兵夜遁理藩院官屬未偵報又不悉力邀
擊愛松古復坐鞭責罰鍰

世祖章皇帝順治元年擢任佐領隨都統葉臣等征山西
時流賊李自成西遁其偽伯陳永福據太原我軍
以紅衣礮攻之城圯永福挾衆突出愛松古以蒙

古兵迎戰多斬馘獲馬千餘又追敗賊將馬驤於
黃河獲舟十有五二年隨都統巴哈納進圍延安
賊馬步出城來犯愛松古邵之尋率八騎躡追自
成獲其孥三年五月蘇尼特部騰機思等率所部
叛奔喀爾喀七月豫親王多鐸奉

命集兵克嚕倫河進勦愛松古率前鋒兵扼據險隘大軍
繼進騰機思遁走復隨侍郎尼堪副都統明安達
禮乘夜追擊獲其輜重斬其台吉茂海遂渡圖喇

河喀爾喀土謝圖汗以兵二萬拒戰愛松古隨鎮
國將軍瓦克達等敗其馬兵追逐三十餘里四年
叙功予雲騎尉世職五年四月奉

命率蒙古兵六百駐防太原涇陽叛賊李陽以二千人來
犯愛松古敗其衆斬李陽以徇十一月又擊敗叛
賊王享明於交城是時叛鎮姜瓖據大同賊黨劉
遷糾衆萬餘謀犯代州與瓖犄角愛松古聞報率
駐防兵馳赴代州偕遊擊高國勝籌畫守具遷擁

衆猝薄城下立雲梯為乘城計愛松古力禦之獲
梯九斬賊三百賊益兵掘城我軍自城上發矢石
賊多死遷走繁峙六年正月賊復來犯潛結城郭
奸徒為內應門啟賊衆擁入郭愛松古督兵嬰城
固守越十餘日端重親王博洛統兵赴援擊敗賊
衆斬賊渠郭芳遷遁代州平乃還駐太原四月壤
黨十餘萬由清源犯太原愛松古與巡撫祝世昌
議賊勢猖獗宜相度形勢據險防禦使不得逼城

下乃分遣將士赴清源徐溝禦賊會端重親王率兵自晉祠入勦賊衆敗遁七年遇

恩詔授騎都尉叙功加一雲騎尉八年擢叅領尋擢鑲白旗蒙古副都統兩遇

恩詔晉世職為二等輕車都尉九年孫可望等掠湖南愛松古隨敬謹親王尼堪率兵進勦師至衡州王歿於陣師還以不及救王降世職為騎都尉兼一雲騎尉十六年致仕康熙十四年六月卒

賜祭葬如典禮子訥青初以三等侍衛於順治十六年隨
征海賊鄭成功至廈門卒於軍至是以訥青之子
瑪爾繼襲職

尼堪

尼堪姓納喇世居松阿里烏喇

太祖高皇帝時率衆來歸

賜號巴克什後隸滿洲鑲白旗初以說降蒙古科爾沁部
授騎都尉天命十年偕侍衛博爾晉等率兵征呼

爾哈部收獲五百戶師還

上郊勞賜宴天聰初擢一等侍衛從

太宗文皇帝征明攻錦州有功七年隨貝勒等鞫獄藩部
同行佐領阿什達爾漢以所貴

勅諭二十道付尼堪尼堪委之從役遂失其九所司奏劾
論罰如律是年萬齊忒部台吉額林等歸順

命尼堪往迎之明年正月收其所部戶口及牲畜以還七

月

上統大軍征明道遇察哈爾部衆來降尼堪奉

旨還盛京安置降人家屬時鄭親王濟爾哈朗留守

盛京今尼堪同卦爾察席特庫率駐防兵十二人偵
明兵猝遇敵奮擊之追至遼河凡三戰斬馘百餘
衆悉驚潰九年隨貝勒岳託駐兵歸化城土默特
部長博碩克圖之子私與明通使人往喀爾喀約
明使偕來岳託遣尼堪同叅領阿爾津等伺之擒
其使十人及明使四人以獻尋與承政英俄爾岱

馬福塔等齋

諭朝鮮崇德元年六月授理藩院承政二年正月大軍攻

克朝鮮國都

上命尼堪同叅領吉思哈佐領葉克舒率八旗及科爾沁
扎魯特敖漢奈曼諸外藩兵征瓦爾喀將出朝鮮
境有朝鮮兵於吉木海列營抗拒尼堪率師進擊
大破之斬其平壤巡撫朝鮮合兵二萬襲我軍後
尼堪與吉思哈等設伏誘敵殲萬餘人敵遁據山

巔立柵拒守我師圍之三日遂下降其哈忙城巡撫及各城總兵副使等官獲牲畜布帛等物無算進略瓦爾喀即以所獲分給外藩將士遣之還班師奏凱尋同承政阿什達爾漢往科爾沁巴林扎魯特喀喇沁諸部頒

赦詔並會諸部王貝勒清理刑獄三年五月部議尼堪於科爾沁察審諸事狗庇失實應解部任籍家產半得

旨解任免籍家產七月授理藩院右叅政四年大軍征明
檄調科爾沁諸部兵來者俱不及額

詔尼堪會科爾沁王貝勒等訊其罪遂厯喀喇沁土默特
諸部讞定罪狀五年四月

上以尼堪克副任使授三等輕車都尉先是承政薩穆什
喀等征索倫部俘其衆數千至是復有數百戶來
歸

命尼堪往頒

賞賚並與郭爾羅斯部新附之衆共編為八佐領而還七

月奉

諭檄外藩兵征索倫簡其軍實

世祖章皇帝定鼎燕京以功進二等輕車都尉順治二年

隨豫親王多鐸平定河南統外藩兵由南陽趨歸

德招服一州四縣晉一等輕車都尉三年復隨豫

親王討蘇尼特部騰機思大破其衆多斬獲明年

叙功晉三等男遷本院尚書六年喀爾喀使至餽

睿親王多爾袞馬而不及異親王滿達海異親王使人告理藩院尼堪以啟睿親王王曰於例云何曰外藩職貢例不越送諸王王惡其語侵已令內大臣議尼堪罪奪其俸三遇

恩詔加至三等子世襲固替十年

上以尼堪宣力有年衰老可念

特命以原官加一級致仕晉二等子十七年卒

賜祭葬無嗣以其弟阿穆爾圖阿錫圖及從子瑪拉兆資

分襲其職瑪拉自有傳

齊爾格申

齊爾格申世居寧古塔以地為氏

太祖高皇帝時隨其兄納林率丁壯百餘來歸即以納林
管之授為佐領隸滿洲鑲白旗納林卒齊爾格申
仍其任率所部鎮達卜遜木城明人來攻耀州齊
爾格申往援敗之淤泥河還駐平山見海濱鹽徒
千人具舟將竄乘夜襲之殪其衆明錦州守將來

犯齊爾格申擊之面被創奮勇力戰卒敗敵

太宗文皇帝天聰六年修蓋州城移人戶以實之

命齊爾格申隨副都統石國柱叅領雅什塔等率兵駐守

八年以克副任使授騎都尉世職是時明邊將數

誘我新附之衆往歸齊爾格申嘗率兵十沿海緝

捕逃亡有七人將渡海明人以舟迎之既離岸矣

齊爾格申涉水追射殪其執烏鎗者一人及倡逃

者一人遂躍入其舟生擒明備禦一及邏卒十三

人旋復率兵扼北新渡口偵知敵舟五十餘泊島
即設伏以待果有二十餘人入島伐木伏發盡獲
之海中敵舟有二人遙呼曰我逃人也誰敢逐我
者齊爾格申挈小舟應聲猝至擒其一斬其一敵
舟驚潰崇德元年四月分別駐防年滿各官功罪
以齊爾格申捕獲逃人甚衆駐守稱職

賜良馬五月隨武英郡王阿濟格征明宣府薄大同戰城
下兩敗敵衆出延慶州俘人戶牲畜以還

世祖章皇帝時嘗任

福陵總管順治七年遇

恩詔加一雲騎尉世職先是齊爾格申之從弟多尼喀於
崇德七年隨貝勒阿巴泰征明至山東攻萊陽縣
先登克其城

賜號巴圖魯授騎都尉又一雲騎尉世職至是卒

命齊爾格申併襲為一等輕車都尉復兩遇

恩詔晉爵三等男康熙十二年三月卒

賜祭葬如例孫石清襲爵

揚善

子羅碩

揚善姓瓜勒佳費英東第四弟音達戶齊之子也

太祖高皇帝時以其祖索爾果歸附功授騎都尉世職初

隸滿洲鑲黃旗後改隸鑲白旗

太宗文皇帝即位設十六大臣以揚善佐理鑲黃旗事尋
任護軍統領三年從大軍征明北京遵

上方略衝鋒破堅所至有功五年攻大凌河城與明監軍

道張春戰冒矢石先衆入陣擊敗敵兵胸腕中創
各一晉三等輕車都尉擢內大臣六年

上統大軍親征察哈爾揚善從時林丹汗既率衆遁其部
衆近明界沙河堡者悉逃入堡內揚善奉

命率精兵六十人偕通事顧祿古齋

諭索取之明人驚懼盡歸我察哈爾逃人崇德二年征大
同蒙古部人有被掠者悉取以歸旋授議政大臣
六年隨鄭親王濟爾哈朗圍錦州以城內明兵出

犯鑲黃旗官兵退怯避敵揚善坐徇隱論罰贖得
旨寬免順治元年四月都統和洛輝希睿親王多爾袞意
誣告肅親王豪格言詞悖妄揚善不力為諫阻又
不舉首與其子羅碩俱棄市羅碩初以能通滿洲
蒙古漢語

太宗文皇帝擢居文館崇德元年授國史院學士尋任前
鋒叅領兼刑部理事官凡在文館軍營傳宣

諭旨往來報捷以及問罪朝鮮審斷獄訟罔不當

上意至是以平素出入肅親王府第坐誦附為亂論死順

治八年

世祖章皇帝念揚善父子之無辜也治和洛輝罪
命復揚善輕車都尉世職以其孫霍羅襲

伊遜

伊遜姓瓜勒佳費英東弟音達戶齊之第三子也
初與兄揚善弟吉賽納都祜吉遜等並隸滿洲鑲
黃旗後改隸鑲白旗伊遜少從

太祖高皇帝征伐屢立戰功

太宗文皇帝即位設十六大臣以伊遜佐理鑲黃旗事從
征多羅特率步卒擊敗蒙古兵天聰三年大軍伐
明攻遵化城伊遜先登中礮傷臂

太宗臨視授三等輕車都尉世職尋擢兵部承政七年偕
戶部啟心郎英俄爾岱齋

諭朝鮮宣示

威德定互市議咸稱

昔八年管佐領崇德元年率八旗兵百四十人往助海州
防守明兵望風引遁師還會都統都類獲罪逮繫
兵部叅政穆爾泰慮溽暑蒸鬱驅囚出繫所遣使
為都類設幙次且為拂蠅囚訴其狀伊遜坐同官
隱匿不奏罷任三年更定部院官制仍授為兵部
承政明年兼管副都統奉

命副工部承政薩穆什喀率左翼兵征索倫至呼爾哈部
是時達爾布尼阿哈爾都戶白庫都漢必爾岱等

聚衆抗拒於伍庫爾城伊遜乘夜舉火攻克之進
攻鐸陳未下聞博穆博果爾兵來援我師遂還已
而佐領薩必圖卓布退等率師繼至伊遜復整兵
往鐸陳設伏斬敵七十餘級當薩穆什喀之以師
還也博穆博果爾以兵襲我輜重甲士斃卒多陣
亡者伊遜坐不急入援罪應罷職

詔寬免以罰贖懲之八年卒子噶達渾襲職順治十二年
追謚伊遜曰襄壯

賜祭奠建碑紀績

察哈喇

子富喇克塔

察哈喇姓郭絡羅初隸滿洲鑲黃旗後改隸鑲白旗父常舒為沾河寨長

太祖高皇帝時與其弟揚舒率眾來歸

命分轄其眾為佐領既卒察哈喇仍其任

太宗文皇帝即位以察哈喇列十六大臣佐理正紅旗事

天聰三年大軍征明取遵化薄燕京明年正月旋

師取永平灤州

命貝勒阿敏等守永平都統納穆泰等守灤州以察哈喇
署都統率蒙古左右翼兵守遵化四月同都統武
訥格於樵採所設伏敗敵獲馬二百餘明將合步
騎四千奪大安口察哈喇與武訥格整軍奮擊殲
殪甚衆五月明兵臨灤州納穆泰等走永平阿敏
度不能禦敵撤遵化將士棄城偕歸會敵兵已逼
城察哈喇同都統鄂本兌等突圍出全師以還五

年

上遣都統楞額禮等征明南海島察哈喇率兩紅旗兵隨
征次海濱獲敵船以未足濟師暫駐守猝遇明兵
渡海來犯我佐領穆世屯禦敵陣亡察哈喇督兵
奮擊敗敵別遣人沉其船敵還爭舟不得溺水死
者過半六年五月大軍略明宣府大同邊境分兵
略歸化城及黃河濱

命察哈喇同承政車爾格率兵五百為前隊且備船濟師

十一月同承政巴篤理往朝鮮議職貢歲額九年
隨貝勒多鐸征明錦州與都統阿山叅領武拜等
率兵四百先驅遇明兵三千於大凌河西相對列
陣以衆寡不敵遣騎還告貝勒營貝勒統師馳赴
明兵望見驚潰察哈喇與阿山等分路追擊擒斬
無算凱旋分

賜所俘獲逾年卒子富喇克塔任佐領兼都察院理事官

崇德八年七月擢工部叅政兼叅領

世祖章皇帝順治元年四月授正藍旗滿洲副都統旋擢
本旗蒙古都統隨睿親王多爾袞入山海關擊敗
流賊李自成追至望都連敗賊兵叙功授騎都尉
世職是年冬隨豫親王多鐸征河南趨潼關自成
聚賊抗拒偽汝侯劉宗敏據山列陣富喇克塔同
都統拜音圖以礮擊潰之賊犯我蒙古營復督兵
殲賊無算明年陝西底定移師征江南同都統阿
山馬喇希率兵先驅明兵據泗州北淮河橋我兵

至則焚橋遁遂進克揚州三年隨貝勒博洛征浙
江以雲梯兵攻克處州城進征福建同都統漢岱
克分水關趨泉州連敗拒戰賊衆招撫州一縣三
凱旋加一雲騎尉五年二月以都統巴哈納等違
例奏授佐領吉賽為護軍統領富喇克塔坐扶同
列奏解都統任尋隨征南大將軍譚泰討江西叛
鎮金聲桓次九江賊衆迎戰富喇克塔率師進擊
獲戰艦百餘同都統和洛輝截賊運道奪糧艘二

百進攻南昌聲桓與其黨王得仁糾賊七萬離城
扼據要隘富喇克塔督衆掘港以沙船二十先薄
城明年賊平亂旋富喇克塔卒於軍先是遇

恩詔晉世職為三等輕車都尉七年五月叙江西戰功晉
一等輕車都尉以其子福克都襲

哈寧阿

哈寧阿姓富察世居額宜湖父阿爾圖山率其族
攻薩齊庫城殺部長喀穆蘇尼堪招撫三百餘人

來歸

太祖高皇帝隸滿洲鑲白旗任佐領復分編人戶俾哈寧
阿亦任佐領天聰二年隨貝勒岳託等証明錦州
略松山杏山高橋諸臺堡奮勇擊敵授護軍統領
三年

太宗文皇帝統大軍証明燕京哈寧阿從與明巡撫袁崇
煥總兵祖大壽戰於廣渠門外以敗敵授騎都尉
世職四年奉

命率精兵百人往略明境五年從征大凌河八年大軍征
明大同哈寧阿先馳至小西城列雲梯攻具我師
遂畢登復以二十人出略擊敗敵兵三百九年同
承政圖爾格徇地入明山西界師旋過平魯衛明
兵躡我後還擊敗之追至城壕斬馘無算叙功晉
二等輕車都尉崇德元年從征皮島有功二年列
議政大臣三年隨豫親王多鐸往會鄭親王濟爾
哈朗軍征明道經中後所祖大壽輕師來襲叅領

翁克及土默特部兵先奔哈寧阿且戰且退士卒
被陷論罪應死奉

詔免死革世職籍家產半四年論征明失律之佐領阿蘭
太罪哈寧阿復以徇庇論死

上仍貸之坐鞭責六年從圍錦州再敗敵兵明總督洪承
疇以十三萬兵赴援

上親統大軍環松山而營度明兵必宵遁

命哈寧阿同護軍統領鰲拜率左翼軍列陣右翼地右翼

軍以次遞列屬於海濱夜一鼓明兵果沿海走哈
寧阿率師掩擊敵自相蹂躪死者枕藉尋進攻松
山屢戰俱捷

敏惠恭和元妃之喪也哈寧阿隨武英郡王阿濟格方
守高橋輔國公扎喀納於軍中絃歌而舞事覺哈
寧阿以不舉劾逮繫既而釋之八年三月同護軍
統領阿爾津征呼爾哈部獲男婦二千五百有奇
牲畜貂皮無算七月凱旋得

優眷順治元年隨睿親王多爾袞入山海關擊流賊李自成至望都大破其衆又同都統譚泰率前鋒兵追敗之正定賊倉皇焚輜重遁二年復授三等輕車都尉是年擊賊綏德州賊聞風遁走追敗之延安府城內兵出犯左翼軍又擊卻之時李自成已奔武昌進師馳擊至安陸府獲賊艘八十復與譚泰移兵江南遇敵於楊子江奪其戰艦追至富池口敵列陣岸上又擊敗之三年二月隨順承郡王勒

克德渾征湖南流寇敗偽伯吳汝義降其衆四月
晉二等輕車都尉五月隨肅親王豪格擊敗叛鎮
賀珍於漢中窮追至秦州賊黨武大定退據三寨
山山勢壁立未可攻我師圍之偽遊擊周克德者
遣其子來降導我師由僻徑登其守將石國璽為
內應哈寧阿同副都統阿拉善署護軍統領噶達
渾率兵六百破壁壘入賊皆自山墮崖下斬殺略
盡進征川賊張獻忠略夔州茂州資州遵義相繼

克捷五年正月師旋叙功晉一等輕車都尉世職
是年卒子率顏襲

珠瑪喇

珠瑪喇姓碧魯世居葉赫

太祖高皇帝時率所部呼爾哈人來歸隸滿洲鑲白旗任
佐領天聰三年隨大兵入明邊至遵化擊敗敵兵
閱三日

太宗文皇帝親臨遵化城明山海關兵赴援將入城珠瑪

喇率哨卒十人至擊斬甚衆至燕京遇明總兵滿
桂黑雲龍麻登雲孫祖壽等軍於大紅門同叅領
音達戶齊額駙揚古利擊却之旋克永平復攻昌
黎奮勇先登身被六創叙功授騎都尉世職尋緣
事削去五年圍大凌河城明監軍道張春赴援珠
瑪喇同叅領鄂諾連戰破其前後隊六年從征察
哈爾獲布顏圖台吉於穆魯哈岱殲其從者百餘
人俘其妻子以歸七年隨貝勒德格類岳託攻旅

順口率護軍十人乘船登岸擊甕城步軍統領巴
奇蘭曰誰能用命先登者珠瑪喇與佐領雍舜超
躍而上向敵大呼曰我珠瑪喇登城矣連被三創
不少却卒拔其城

上為嘉嘆親酌金卮以賜復授騎都尉世職九年隨貝勒
多鐸征明夜設雲梯攻錦州被創甚劇崇德元年
征朝鮮自山巔力攻奪其寨門大兵繼之不戰而
入遂取一寨又率兵征明敗其總兵海某軍取四

縣師還擊敗開平兩營兵三年七月授兵部理事官十月從圍錦州率甲士四十人攻襲廣寧北宮峙山山寨收降駱駝山兵衆又與都統石廷柱招降大凌河北山四寨六年同叅領禧福奉

命往張家口董理互市事及還法司劾其以私財市貨物向藩部人索馬諸罪狀論死籍沒得

旨寬宥草世職輸所市貨物入官尋隨鄭親王濟爾哈朗圍錦州敗敵騎之來奪我紅衣礮者敵騎復犯我

軍珠瑪喇注矢射之應弦而仆敵衆退走七年與
前鋒統領沙爾瑚達征松阿里江呼爾哈部落招
降喀爾喀木等十屯俘丁壯千餘及牲畜輜重以
歸

命禮部官迎勞宴賚之

世祖章皇帝順治元年珠瑪喇任叅領率兵從睿親王多
爾袞入山海關擊敗流賊李自成七月授正藍旗
滿洲副都統尋擢兵部侍郎明年正月叙克明燕

京破流賊及克錦州松山功復授騎都尉世職十
一月與副都統和托等駐防杭州任左翼副都統
時明福王朱由崧之大學士馬士英竄嚴州與其
總兵方國安糾衆犯餘杭珠瑪喇率兵擊走之還
距杭城三十里突遇土賊復大破其衆國安等仍
聚衆數萬於江東赭山及杭州之朱橋范村所在
肆掠珠瑪喇同總兵田雄副將張杰等分兵進勦
賊悉平三年從征福建與護軍統領敦拜擊敗其

總兵黃某軍四年考滿加一雲騎尉五年隨征南
大將軍譚泰勦江西叛鎮金聲桓敗賊兵七萬又
與都統和洛輝及沙爾瑚達連敗賊兵焚其戰艦
千三百餘招撫九江一府五縣七年三月遇

恩詔賜勅授三等輕車都尉世襲罔替又以平江西功晉
世職為二等八年擢正白旗蒙古都統遷吏部尚
書兩遇

恩詔晉三等男十年冬吏部擬銓廢員房之麒為山東驛

道之麒嘗任山東按察使罷職占籍青州為山東
巡按馮右京列薦起用至是改歸直隸東明籍有
旨詰問吏部以直隸縉紳保結可憑復奏會給事中許作
梅劾之麒於青州置田宅朦朧就銓復奉

旨嚴飭察核乃議之麒應革職

上以部臣於銓授時不行詳勘及詰問仍支飾

命王大臣察奏珠瑪喇坐罰鍰罷尚書任專管都統事十
一年孫可望李定國自雲貴寇廣西分兵犯廣東

連隔郡邑珠瑪喇奉

命為靖南將軍同敷拜徃征之

賜敕諭曰賊犯廣東故特遣爾等爾等至惟以安民為首務嚴飭兵將恪遵紀律賊若竄入廣西可與平南靖南兩王及總督李率泰相機酌議勦撫若入雲貴則擇善地休兵奏聞候旨至遇賊對壘時爾二人居中調度毋以輕謀致敗用全我師是時定國犯新會平南王尚可喜靖南王耿繼茂等先率兵徃援至三水縣分布

沿江隘口以待大軍比珠瑪喇至遂合兵進勦敗之於珊洲斬其副將一擒兵將十餘人獲首級百五十餘既抵新會定國糾步騎四萬分據山峪列礮象拒戰珠瑪喇遵

上方略指揮將士奮勇衝擊賊兵潰奔定國復出兵四千自山巔馳下迎截我師又擊敗之奪其山定國遁走十二年正月奏捷得

旨嘉獎二月定國竄高州珠瑪喇與敦拜授策副都統畢

力克圖鄂拜等分兵追躡敗定國於興業再敗之
於橫州定國渡江焚橋驚走我師躡之三戰皆捷
定國率殘兵走賓州入南寧竄安隆珠瑪喇與尚
可喜等遂復高雷廉三府三州十八縣及粵西二
州四縣獲象十六及馬二百餘器械無算下部議
叙復

賜敕諭曰頃者李定國棲據南方頻侵兩粵二王及諸臣
宣厥忠勇謀操必勝於新會等處殺賊既多復追至橫

州江岸降其軍將獲其器械克定高雷廉等府州縣先後屢捷功績懋著朕甚嘉之特賜敕諭以示獎勵爾等其益勵忠勤垂名永久九月班師

上召見於南苑

諭大學士馮銓等曰珠瑪喇以元戎統領大兵出征廣東捷歸今五旬矣如此年齒建立大功殆福人也

賜茶獎勞明年部臣叙功擬晉世爵一等男兼一雲騎尉上以珠瑪喇功多不應循常格議叙

特諭吏兵二部曰都統珠瑪喇等率兵擊敗李定國雪衡
州桂林之忿快慰衆心朕甚嘉悅其軍功再加議叙尋
議晉爵三等子十五年十一月以年老致仕康熙
元年卒年五十有八

賜祭葬謚襄敏次子博通鄂襲爵

鄂屯

鄂屯滿洲鑲白旗人姓富察世居訥殷其伯父夢
古慎郭和率所部三百人來歸

太祖高皇帝授為佐領使統所部既卒子喀爾喀嘛仍其職尋獲罪罷以鄂屯代之天聰五年同佐領武巴海隨副都統蒙阿圖征瓦爾喀進師額黑庫倫及額勒約索降其部衆崇德元年授騎都尉世職三年任戶部理事官六年大軍圍明錦州明總督洪承疇率兵赴援我右翼兵擊之於松山失利兩紅旗及鑲藍旗駐營地為敵所奪鄂屯率其屬三十五人守山巔力戰敗敵得

優賚

世祖章帝順治元年隨睿親王多爾袞入山海關同叅
領珠瑪喇擊敗流賊李自成騎兵追至望都復敗
之二年論功加一雲騎尉三年隨副都統巴山等
率兵駐防江寧任協領聞巢縣為賊襲據即率兵
馳擊復其城六年同提督張大猷勦六安州山賊
陣斬賊渠張福寰先是江寧設總督漕儲兼理錢
法戶部侍郎以鄂屯無任之尋裁仍專任協領三

遇

恩詔晉世職至一等輕車都尉九年平南將軍金礪以海賊鄭成功侵據海澄縣請增兵進勦部議調江寧駐防兵二百往助鄂屯與理事官額赫理烏庫理率之以行至則進攻海澄之東壘賊刦我紅衣礪鄂屯同額赫理擊却之賊悉衆十餘萬來犯鄂屯三戰皆捷賊乃毀橋拒守鄂屯同烏庫理擊潰其衆先後招降賊兵數千平賊寨數十師還叙功加

一雲騎尉十六年因老乞休康熙十五年正月卒
子鄂塞襲職

錫卜臣

錫卜臣滿洲鑲白旗人姓瓜勒佳費英東弟郎格
之孫也

太宗文皇帝天聰五年授前鋒侍衛崇德元年從

上征朝鮮三年隨睿親王多爾袞証明由青山口毀邊牆
入至通州明太監高起潛率兵來戰錫卜臣同前

鋒叅領素爾德擊敗之五年七月大軍圍明錦州
敵騎自杏山來援錫卜臣同前鋒統領烏拜擊敗
其衆錦州馬步兵出城刈草又屢敗之六年復圍
錦州擊敗明總督洪承疇三營步兵敵千騎自寧
遠來窺錫卜臣與前鋒統領努三追擊至連山斬
獲無算

世祖章皇帝順治元年隨大軍擊流賊李自成敗賊將唐
通於一片石追敗自成於安肅望都復進征山西

敗賊於太原二年隨英親王阿濟格征陝西錫卜
臣同兵部理事官鄂摩克圖擊敗賊衆自成走湖
廣又同前鋒叅領錫特庫追至安陸擊毀賊船是
年擢前鋒叅領叙功予雲騎尉世職三年隨肅親
王豪格征流賊張獻忠師至陝西擊敗叛鎮賀珍
於漢中遂進四川屢戰皆捷獻忠既滅還京改護
軍叅領五年冬大同總兵姜瓖叛錫卜臣同護軍
統領素拜往討屢敗賊復隨端重親王博洛擊敗

賊黨劉遷解代州圍屢遇

恩詔並叙四川大同戰功晉世職至二等輕車都尉十一年擢護軍統領十二年

命同都統卓洛等率兵駐防荊州時張獻忠遺黨孫可望降於明桂王掠湖南據辰州十三年錫卜臣同卓洛由澧州常德進征賊聞大兵至棄城遁追破之於瀘溪賊竄入山谷遂復辰州十六年海賊鄭成功犯江寧錫卜臣同安南將軍明安達哩自荊州

赴援破偽都督楊文英等於揚子江斬獲無算

聖祖仁皇帝康熙九年擢鑲白旗蒙古都統十二年

諭獎久著勞績諸大臣加錫卜臣太子少傅十三年四川
巡撫羅森提督鄭蛟麟總兵譚宏吳之茂等叛應
逆藩吳三桂

上命錫卜臣為鎮西將軍率兵鎮守陝西是年冬錫卜臣
同都統赫葉等征四川賊據保寧我兵營於蟠龍
山為賊所刼復阻截饗運錫卜臣還漢中值陝西

提督王輔臣叛於寧羌賊黨分據棧道錫卜臣駐
漢中饟運久阻食不繼十四年八月還西安疏言
自本年二月兵糧匱竭取食賊麥以至七月食已
罄盡計欲保全大軍乃自漢中出沿途擊賊馬匹
器械俱盡

上命陝西督撫給帑買馬人各一匹並整頓器械鎮守西
安十九年還京仍任都統二十二年四月議政王
大臣追論蟠龍山戰敗罪應罷任革世職籍沒得

旨錫卜臣尚有勞績免其籍沒尋卒於家

棟阿賚

棟阿賚滿洲鑲白旗人姓蒙郭初任護軍叅領

太宗文皇帝天聰八年隨都統阿山征明錦州敵列營城南山岡棟阿賚先衆衝擊破其步兵營崇德三年隨貝勒岳託征明由墻子嶺入邊擊敗明總督吳阿衡軍五年隨豫親王多鐸圍錦州設伏擊敗塔山援兵六年四月隨鄭親王濟爾哈朗圍錦州我

軍分伏於錦州南山西岡及松山北嶺而令前鋒
兵誘明援兵之自杏山至松山者敵至棟阿賚率
衆奮擊斬獲無算又破敵營於松山北岡九月大
軍圍明總督洪承疇巡撫邱民仰等於松山城城
內兵逸出棟阿賚率兵追擊殲之敵馬步兵乘夜
出城犯我鑲黃旗汛地復奮擊敗走追越城壕而
還八年三月同護軍統領阿爾津哈寧阿等征黑
龍江呼爾哈部攻克博和哩諾爾噶勒都里三屯

招降大噶勒達蘇小噶勒達蘇二屯又進圍綽庫
禪能吉勒二屯俘丁壯百人師還

賚貂皮及白金九月隨鄭親王征明寧遠城內兵出戰棟
阿賚率護軍四十人奮擊明兵遁走遂進克前屯
衛城復同護軍統領阿濟格尼堪布善等攻拔中
前所城

世祖章皇帝順治元年正月兼任刑部理事官二月叙錦
州寧遠功予雲騎尉世職四月隨睿親王多爾袞

入山海關敗流賊李自成二年正月叙功晉世職
為騎都尉三年擢正黃旗滿洲副都統是年隨順
承郡王勒克德渾征湖廣擊敗自成餘黨一隻虎
等於荊州凱旋

賚白金四年正月

命率兵駐防杭州既至遣兵勦滅孝豐縣東栢山土賊時
海賊鄭彩等寇掠福建十一月棟阿賚奉

命同侍郎辰泰統兵征勦五年師至建寧連敗賊將曹大

鎬傳國用張耀星等復建寧府城及同安平和二縣鄭彩聚賊船千餘據長樂連江二縣棟阿賚辰泰及副都統李率泰等分兵進擊盡驅出海又勦其餘黨於興化擒偽總督顧世臣等十一人斬之其被賊脅從城邑亦皆就撫六年

召還京授都察院叅政兩遇

恩詔並叙平福建功晉世職至一等輕車都尉八年二月

卒子棟山襲職

車克

車克滿洲鑲白旗人姓瓜勒佳世居蘇完祖克爾

素

太祖高皇帝時來歸父席爾那任佐領既卒車克仍其任

無前鋒侍衛天聰八年從

上征明由大同趨懷遠薄左衛城與前鋒統領圖魯什等

設伏敗明總兵曹文詔騎兵略地越代州百餘里

至五台山還遇明總兵祖大弼兵二百餘擊敗之

並多斬獲崇德三年授戶部副理事官會戶部承政韓大勲私取庫金事覺以前此貯庫時車克失記冊檔論死

上命免死罰鍰仍留部用尋兼任叅領五年鄭親王濟爾哈朗率兵圍錦州令車克同前鋒統領勞薩等領兵三百設伏高橋北以縱敵弗擊議罪籍家財半年復赴鄭親王軍助圍錦州破明總督洪承疇步兵三營

世祖章皇帝順治元年從大兵入關擊敗流賊李自成二年叙功授騎都尉四年考績以車克在戶部能任事加一雲騎尉五年擢本部侍郎隨英親王阿濟格征大同叛鎮姜瓖車克分兵往援太原與巡撫祝世昌合謀遣兵勦除瓖黨劉遷萬鍊瓖尋伏誅七年兼任正白旗副都統兩遇

恩詔晉世職至二等輕車都尉八年三月解侍郎任改都察院叅政四月駐防河間佐領碩爾對訐戶部諸

臣給饗不均下法司鞠實由尚書巴哈納主議車
克前任侍郎坐附和降世職為雲騎尉九月擢戶
部尚書明年列議政大臣遇

恩詔晉騎都尉十年

上以車克前此降世職處分過重仍復二等輕車都尉十
一年八月

上嘉其素効忠勤任部務有勞績加太子太保十二年擢
秘書院大學士晉少保奉

命輯

太祖

太宗聖訓充總裁官十三年三月自陳學識疎淺未諳秘

書院事請罷大學士任

上弗允六月

諭吏部曰戶部尚書職司國計倚賴非輕必得精敏練達之才方能勝任大學士車克向任司農廉勤夙著着晉少傅兼太子太傅仍管戶部尚書事十四年考滿加少

師兼太子少師十六年奉

命赴江南督造戰艦十七年同安南將軍羅托統兵勦海

賊鄭成功十八年

聖祖仁皇帝即位車克奉

詔還京調吏部尚書先是旗人阿那庫與其兄金布爭產
奉有

諭旨均分阿那庫旋以金布隱匿婢女三人訴戶部車克
以婢女舊為金布所有於分產無涉置弗理阿那

庫復與本旗佐領吉詹爭論吉詹以阿那庫違

旨妄爭牒戶部車克移牒刑部遂坐阿那庫違

旨罪論絞至是阿那庫妻擊登聞鼓訟冤

詔所司勘議阿那庫違

旨之罪得釋車克應革任罰鍰

詔削加銜免革任康熙元年復授秘書院大學士六年以

疾致仕十年六月卒

賜祭葬如典禮謚文端子溍爾敏襲職

欽定八旗通志卷一百六十七

欽定四庫全書

欽定八旗通志卷一百六十八

人物志四十八

大臣傳三十四

滿洲鑲白旗二
哈納額色赫

興烏
葉璽
喀爾喀
覺羅巴

喇烏庫理
達克薩哈

索渾
莽依圖
瑚圖

納都瑚
瑪

興烏
兄孫喀爾奇

興烏滿洲鑲白旗人姓納喇世居哈達地父素巴

海於

太祖高皇帝時率二百人來歸編佐領令其長子莽果統之興鵲素巴海第三子也受知

太宗文皇帝天聰八年予騎都尉世職崇德元年隨英親王阿濟格證明同都統達爾罕攻順義縣先登克城叙功加一雲騎尉三年任工部理事官考滿晉世職三等輕車都尉

世祖章皇帝順治元年隨大軍征流賊李自成至陝西賊衆自延安府出犯興鵲率衆截擊大敗之二年追

剿自成於武昌躡擊之富池口獲其船賊黨整衆
據河岸以拒興鵬同護軍統領哈寧阿叅領希爾
根擊潰其衆又同護軍叅領布克沙至江南池州
府明總兵黃斐乘舟拒戰我兵奮擊潰走斬首二
百級獲船十二三年蘇尼特部騰機斯等叛奔喀
爾喀興鵬隨豫親王多鐸率兵追之敗土謝圖漢
及碩類汗兵敘功晉世職二等輕車都尉七年擢工
部侍郎尋以考滿並三遇

恩詔晉至二等男爵十五年以會勘出征福建將士在羅源縣敗遁事徇情定讞罷任革世職十八年

聖祖仁皇帝即位以興鵠處分過重復予世職一等輕車都尉魚一雲騎尉康熙三年九月卒子成格襲世職其兄莽果之孫喀爾奇於順治十六年以護軍校隨安南將軍明安達哩駐防荊州聞海賊鄭成功犯江寧率兵赴援敗偽都督楊文英於揚子江口康熙十三年署護軍叅領隨定南將軍希爾根

討逆藩耿精忠師次南昌賊已陷建昌撫州因督
兵圍撫州敗賊於四十里塘堡地十四年偽都督
楊益茂據九江府七里岡喀爾奇偕衆戰卻之尋
擊敗偽將軍邵連登復建昌府城時逆賊吳三桂
據湖南其黨夏國相陷萍鄉喀爾奇隨大軍進征
國相敗走遂趨長沙破偽總兵謝勝先於瀏陽十
七年隨貝子彰泰敗偽將軍吳國貴於武岡州凱
旋叙功予雲騎尉世職尋卒子喀爾岱襲

覺羅巴哈納

覺羅巴哈納滿洲鑲白旗人

景祖翼皇帝第三兄之四世孫也年十七即効力戎行屢從

太宗文皇帝征伐著有勞績天聰八年授騎都尉世職九年

命免功臣徭役並分設佐領巴哈納與馬崇德三年授刑部理事官明年擢本部叅政尋兼正藍旗滿洲副

都統七年以刑部失勘違禁出邊之布山罪又拒戰錦州之護軍阿桑喜自陳戰功於法司巴哈納審斷不公革世職留副都統任八年七月論登州畧地諸將罪巴哈納以倡議令軍士皆歸坐奪所俘獲論罰如律順治元年四月擢正藍旗蒙古都統尋調滿洲都統六月與都統石廷柱徇霸州滄州德州臨清皆下之七月

詔平山西遂移師會都統葉臣軍遣使招降明總督李化

熙等十一月同石廷柱率師自汾州趨平陽大敗賊兵於西山寨俘斬甚衆降偽副將三員至黑龍闕降明守備三員綜計得降卒六千餘人以功

賚白金授三等輕車都尉世職三年九月隨肅親王豪格勦流寇張獻忠於四川分兵討平遵義夔州茂州諸路斬偽官數百員降甲士數千獲馬羸輜重無算餘寇悉平五年二月以前討張獻忠時護軍統領哈寧阿被圍護軍統領阿爾津蘇拜援出之叅

領希爾根遲留不救及師旋希爾根冒功妄爭巴
哈納勘察失實又肅親王欲以有罪揚善之弟吉
賽為護軍統領巴哈納與議政大臣索渾不為阻
止扶同進奏部議革職解任得

旨改降世職為騎都尉尋擢戶部尚書八年正月
世祖章皇帝既親政已哈納入奏事畢

上詢民間疾苦及國家無益之費巴哈納以遣官採辦臨
清軌分派漕船載運通州由五閘撥運供用對遂

奉

諭永行停止二月兼正白旗滿洲都統四月駐防佐領碩爾對訐告戶部給餉不均下法司鞫問部議巴哈納阿附睿王私厚白旗兵丁給餉不絕刻待黃旗兵丁屢請不發應論死籍沒

上命免死革世職罷任籍沒家產三分之二明年十月起授刑部尚書十一年二月同諸大臣奉

命分賑畿輔

賜敕印以行八月

上嘉其素効忠勤始終不渝

特晉太子太保明年二月加少保兼太子太保五月晉少

傅兼太子太傅授弘文院大學士十五年改中和

殿大學士十三年復設內三院仍授秘書院大學

士康熙元年兼鑲白旗滿洲都統五年十二月卒

贈少師兼太子太師康熙八年五月已哈納子已

什訴言已哈納自十七歲効力行陣厯四十餘年

因與鰲拜遇必隆和不給謚號不與立碑部議
給予祭葬得

旨己哈納准予謚謚敏壯

額色赫

額色赫滿洲鑲白旗人姓富察世居訥殷祖莽吉
圖當

太祖高皇帝時隨其兄夢古慎耶和來歸額色赫初事

太宗文皇帝由護軍校屢從征授兵部理事官天聰九年

隨副都統巴奇蘭征黑龍江先還奏捷崇德三年
擢秘書院學士五年齋

敕赴錦州

諭睿親王多爾袞駐兵機宜會都統圖爾格敗明兵於木
倫河額色赫以捷還奏六年三月同內大臣圖爾
格大學士范文程剛林等往訊圍錦州大軍離城
遠駐遣兵歸家等狀王貝勒大臣皆服罪降罰有
差八月明總督洪承疇率衆十三萬援錦州至松

山額色赫受

上方畧往諭都統王貝勒等尋還奏敵勢甚衆宜益兵
上遂統師親征擊敗之七年鄭親王濟爾哈朗克錦州祖
大壽降額色赫至軍營宣

諭慰撫降衆八年隨貝勒阿巴泰征明至山東下兗州同
叅領穆成格等奏捷

世祖章帝順治元年隨大軍入關定燕京二年叙功授
騎都尉世職四年考滿加一雲騎尉五年遷刑部

啟心郎八年擢國史院大學士九年充纂修

太宗文皇帝實錄總裁官會試正考官列議政大臣復充
武會試正考官屢遇

恩詔晉世職至一等輕車都尉十二年加少保兼太子太
保再充會試正考官時方纂輯

太祖

太宗聖訓又奉

諭取經史中忠臣孝子賢人廉吏之事蹟語言分類採輯

成書名曰資政要覽額色赫克總裁官十三年

敕使朝鮮鞠獄是年考滿晉少傅兼太子太傅廕一子入

監十五年改保和殿大學士十六年

詔獎奉職勤勞晉少師兼太子太師十八年十月卒

賜祭葬如典禮謚文恪

聖祖仁皇帝念額色赫宣力有年敬慎素著

特擢其子塞色赫秘書院學士而其孫常明襲世職

世宗憲皇帝時以額色赫入祀賢良祠

葉璽

兒子辰布祿

葉璽滿洲鑲白旗人姓郭絡羅祖常舒為沾河寨
長

太祖高皇帝創業時同其弟揚舒率衆來歸從征尼堪外
蘭及誅諾密納皆在事有功尋擢任大臣以其子
布哈圖察哈喇並為佐領葉璽布哈圖之子也

太宗文皇帝崇德三年以護軍叅領隨睿親王多爾袞征
明由青山口毀邊牆入破薊遼總督吳阿衡軍五

年圍錦州擊敗杏山騎兵及松山步兵

世祖章皇帝順治元年隨英親王阿濟格征流賊李自成
二年正月至延安府賊兵出犯葉璽同左翼兵奮
擊大敗之李自成尋遁走湖廣大兵進擊抵安陸
府獲賊船四復同護軍統領哈寧阿自大江追擊
流賊至富池口奪其戰艦賊復列陣岸上又擊敗
之尋還京三年四月蘇尼特部騰機斯騰吉特等
叛奔喀爾喀葉璽隨豫親王多鐸貝子博和託等

征之屢擊敗賊衆追至布爾哈圖山擒斬七人招降喀爾喀二十五戶七月師自圖拉河西行至扎濟布拉克遇喀爾喀土謝圖漢兩子率兵二萬來犯葉璽力戰歿於陣

賜卹贈護軍統領予騎都尉職世襲罔替無子以弟之子額爾遜襲

世宗憲皇帝雍正二年建昭忠祠以葉璽入祀葉璽兄之子辰布祿初任佐領兼工部理事官崇德三年隨

睿親王多爾袞征明山東攻克陽信縣城順治三年隨定西大將軍和洛輝擊敗賊賀珍兵於漢中又隨肅親王豪格征流賊張獻忠同護軍叅領達素鄂摩克圖等屢挫賊鋒師還賊躡其後復同前鋒叅領錫卜臣還擊敗之兩遇

恩詔予騎都尉世職十一年從征海賊鄭成功至浙江舟山與署護軍統領尼雅達敗偽總制陳六御等叙功晉世職為三等輕車都尉十七年卒子瑪晉襲

喀爾塔喇

子赫特赫

喀爾塔喇滿洲鑲白旗人姓章佳世居費雅朗阿
父圖爾坤歡詹當

太祖高皇帝時率子五人及百餘戶來歸授佐領使轄之
既卒喀爾塔喇仍其任

太宗文皇帝崇德三年任護軍叅領隨豫親王多鐸征明
寧遠將入邊截擊敵兵生擒六人及還遇敵兵又
連敗之六年大軍圍明錦州城內兵出犯鑲黃旗

所守壕塹左翼護軍俱退避壕內喀爾塔喇及叅
領達木布等坐罪應論死

上命從寬罰鍰

世祖章皇帝順治元年四月大軍入山海關擊流賊李自成
喀爾塔喇率本旗兵敗賊騎追至望都盡殲其
後隊旋隨都統巴哈納等下河南懷慶擊敗賊兵
進定山西破賊於黃河渡口追至榆林二年自成
遁走湖廣喀爾塔喇隨護軍統領鰲拜攻安陸府

克之復率兵追剿連破賊營獲船六十餘五年江西總兵金聲桓以南昌叛

上命征南大將軍譚泰往討之大軍至童子渡賊據水為陣喀爾塔喇奪其舟梁擊敗賊衆分兵趨饒州遇偽副將三人率衆三千迎戰喀爾塔喇同叅領巴朗等擊敗之乘勝攻克饒州城進征南昌甫駐營賊衆來犯喀爾塔喇奮戰挫賊既而大軍掘壕圍城喀爾塔喇駐守江岸賊以船運糧入城喀爾塔

喇屢率衆邀擊獲船八又縱火焚其船七百餘六年正月大軍合攻城北喀爾塔喇同叅領良泰另率兵於城南樹雲梯破城凱旋得

優賚九年八月擢護軍統領時孫可望李定國等擾湖南上命敬謹親王尼堪統師征剿喀爾塔喇領護軍以隨十一月大軍至衡州彼衆迎戰我軍既擊敗之乘勝疾趨遇伏喀爾塔喇力戰歿於陣先是叙平流賊功予喀爾塔喇雲騎尉世職嗣叙平金聲桓功凡

三過

恩詔洊晉一等輕車都尉及是議卹晉三等男

賜祭葬如典禮諡忠壯立碑墓道子赫特赫襲爵十六年
任叅領隨大軍征海賊鄭成功於福建擊敗偽總
兵黃昌等尋率舟師進攻廈門歿於陣議卹予騎
都尉世職以其兄赫仲襲弟格爾德襲三等男

烏庫理

烏庫理姓扎庫塔先世居和克通吉父瑪爾圖

當

太祖高皇帝創業時率百餘人來歸隸滿洲鑲白旗授騎
都尉世職從大兵征明圍錦州歿於陣烏庫理襲
父職年十六即効力戎行

太宗文皇帝命管叅領事崇德三年隨貝勒岳託征明至
山東明太監馮永盛率兵迎戰擊敗之大軍攻濟
陽縣雲梯兵未至攀堞堞先登揮所部兵克其城
師還將出邊同步軍統領薩穆什喀殿後敵不敢

通道經大平寨復步戰敗敵七年隨征明錦州戰
於松山敵遁走旋合潰兵據北山立營壁壘甚固
烏庫理直前奮擊三戰皆捷

世祖章皇帝順治元年四月烏庫理隨睿親王多爾袞入
山海關擊敗流賊李自成追躡至望都九月隨都
統葉臣攻太原府率數十騎繞城偵視城中兵突
出搏戰烏庫理同叅領薩璧圖杭愛往來衝擊斬
獲甚衆尋隨英親王阿濟格征陝西湖廣江西班

師至池州府偵賊黃斐兵獲賊船十二還京任兵
部理事官叙功加一雲騎尉三年隨肅親王豪格
征流賊張獻忠於四川擊敗賊將高汝礪騎兵獻
忠敗潰衆遁烏庫理追之多斬獲旋軍賊躡我後
還擊却之五年從征大同叛鎮姜瓖圍寧武關偽
巡撫姜輝偽總兵劉維思合兵三千赴援屢犯我
營關內賊衆亦乘隙出拒烏庫理率三旗護軍往
來協擊轉戰關下及偏關西河營等地凡七戰七

勝進趨左衛賊兵萬餘列陣以待烏庫理衝擊破
之復用紅衣鰲攻克其城連敗賊兵多斬殪八年
二月調工部理事官十月仍調兵部三遇

恩詔晉世職至一等輕車都尉十年同理事官額赫理率
禁旅並調江寧杭州駐防兵赴福建會勦海賊鄭
成功時海澄縣為賊所據大軍進征賊扼要隘列
火器拒戰烏庫理連破其營賊乃毀橋斷路烏庫
理躍馬涉河賊衆驚潰大軍畢渡賊又於海岸屯

兵三千餘烏庫理步戰敗之先後與都統金礪及額赫理等招降賊兵數千平賊寨數十叙功加一雲騎尉十二年擢大理寺卿疏陳五事一言

國家定鼎以來滿洲士卒歲從征討所領月餉例有定額而買馬置械一切軍裝皆所自脩留京家口衣食維艱請

恩加賞賚一言兵荒所在民多流離目前已奉

旨賑貸將來作何安輯俾自為生計乞

勅部速議便宜一言綠旗死事弁兵蒙

恩咸予贈卹更請推廣

皇仁飭所司撫慰其妻孥量為贍給一言江廣閩浙沿江

濱海盜賊出沒不常其邊口要區請

勅各督撫詳察機宜增設重兵以資防勦一言我

朝中外一家邊遠番夷職貢之外仍通貿易而西北

蒙古若厄魯特俄羅斯諸部尚阻聲教請

勅理藩院大臣酌議互市條例以昭畫一疏上俱下部議

行尋奉

命往視黃河決口十三年擢漕運總督越三年考滿還

京

賜鞍馬授

盛京總管

聖祖仁皇帝康熙元年改總管為將軍仍以烏庫理任之

是年疏陳所屬兵丁宜定更番直役之例以均勞

逸

詔如所請先是

盛京設戶部禮部工部侍郎等官而兵民獄訟悉隸其事於總管未設刑部至是烏庫理請增設疏下廷議始設刑部侍郎一郎中二員外郎六主事三四年四月以疾卒於任

賜祭葬如例以其世職令二子分襲長子俄謨克圖襲三等輕車都尉次子佛保襲騎都尉兼一雲騎尉

索渾

索渾滿洲鑲白旗人姓仄勒佳初事

太宗文皇帝以佐領兼前鋒叅領崇德三年同叅領沙爾瑚達等率兵五十人往偵明義州擒八人歸四年

上親征明錦州

命索渾分兵畧杏山獲牲畜無算尋以所部兵在松山遇敵退縮被奪弓矢索韃索渾坐約束不嚴

命逮繫尋釋之五年隨睿親王多爾袞圍錦州遇敵兵於松山奮戰多斬獲六年復從

上親征錦州敗明馬步軍於松山斬二十九人明兵自松
山宵遁追至海岸俘斬甚衆旋遇明杏山騎兵復
同叅領席特庫等擊敗之追斬百餘人時蒙古兵
有降明者立寨山巔索渾同叅領瑚里布進攻盡
殲其衆七年隨貝勒阿巴泰征明薊州敗明總督
范志完兵復與都統武賴敗敵於三河敵援兵踵
至索渾同都統巴哈納奮力邀擊敵遂潰走八年
隨鄭親王濟爾哈朗征寧遠有騎兵千餘迎拒索

卷一百一十一
渾率前鋒力戰却敵既而敵軍擾我牧羣復擊却之擒二人叙功授雲騎尉世職

世祖章帝順治元年大兵入山海關討流賊李自成索渾擊敗偽總兵唐通於一片石復隨豫親王多鐸追勸自成師至陝州分兵先驅偽將軍張有曾糾賊騎二百餘屯據靈寶城外索渾率二十人乘夜襲擊獲馬四十餘二年叙入關功晉世職為騎都尉魚一雲騎尉嗣遇

恩詔晉一等輕車都尉六年七月擢護軍統領十月隨巽親王滿達海征叛鎮姜瓖餘黨索渾率兵往圍平遙偽知縣已先率兵民遁走復糾賊五百人回取儲糗我軍奪門入盡殲之七年任吏部侍郎八年改授鑲白旗副都統十五年擢本旗都統十六年同內大臣達素征海賊鄭成功於福建明年勦賊廈門官軍不習水戰失利康熙元年論死罷任削世職尋卒

覺羅果科

覺羅果科滿洲鑲白旗人初任護軍叅領

太宗文皇帝崇德六年隨大軍圍明錦州分兵駐杏山河岸敵兵自寧遠來窺果科同前鋒統領努三擊敗之追至連山斬級三十獲馬三十二七年同努三畧寧遠遇中後所敵騎五十犯我牧地戰却之敵援兵四百踵至並擊之潰遁八年復同努三至界嶺口偵軍事與明兵戰斬其守備及步騎三百餘

俘獲甚衆

世祖章皇帝順治元年隨睿親王多爾袞入山海關擊敗
流賊李自成追至望都二年隨英親王阿濟格征
陝西攻克綏德城自成兄子錦據延安數犯我營
果科同護軍統領希爾根奮勇迎擊三戰三捷自
成奔湖廣我軍追至安陸府屢敗賊衆獲賊船八
十三年隨肅親王豪格征流賊張獻忠過漢中擊
敗叛鎮賀珍獻忠自西充引賊衆迎戰奮擊敗之

復與希爾根搜剿賊黨多所斬獲五年隨鄭親王
濟爾哈朗征湖南任前鋒叅領時明桂王朱由榔
據廣西其總督何騰蛟守湘潭我兵薄城下騰蛟
分兵三門拒戰果科與前鋒叅領瑚沙敗其城西
兵奪門而入尋隨都統佟圖賚率兵趨衡州距城
三十里遇彼衆千餘擊敗之其總兵陶養用據
石橋立寨果科隨副都統碩詹等攻拔其寨復擊
敗胡一青周進唐之兵追擊一青至全州還京授

刑部理事官叙功予雲騎尉世職兩遇

恩詔晉世職為騎都尉兼一雲騎尉十一年三月擢工部

左侍郎七月署尚書事十三年十月

乾清宮成加尚書銜十五年三月

壇

廟工成議叙晉世職二等輕車都尉十七年九月擢工部

尚書先是尚書穆哩瑪甫任事以修理京師通州
諸倉所給磚價視時值浮多與新任侍郎巴進泰同

議裁減窑戶以不敷工費訴於部果科言新任官不知則例令如舊補給十八年五月果科卒輔政大臣鰲拜等以修倉糜費請

旨下王大臣察議由果科主其事罰銀百兩革尚書原銜削世職留軍功所得雲騎尉以其子薩爾布襲康熙七年

聖祖仁皇帝親政薩爾布訴枉求復世職大學士圖海等入奏下部議不准

諭曰前此議處時果科已故較同案官負處分過重
命復還騎都尉以薩爾布魚襲

納都瑚

納都瑚姓瓜勒佳費英東弟音達戶齊之第八子
也初與其兄伊遜鍾金吉賽等俱隸滿洲鑲黃旗
後改隸鑲白旗

世祖章皇帝順治元年納都瑚任護軍叅領隨睿親王多
爾袞入山海關擊敗流賊李自成尋隨豫親王多

鐸敗賊潼關進定西安移師下江南追明福王朱由崧至蕪湖並有斬獲功授雲騎尉世職三年多尼特部騰機思等叛奔喀爾喀納都瑚隨豫親王追勦遇土謝圖汗及碩羅汗兵拒戰並擊敗之五年隨征南大將軍譚泰討叛鎮金聲桓屢敗賊兵復於章江西岸截賊餽運獲艘三十餘七年遇

恩詔晉騎都尉八年二月擢正白旗副都統九月改副都御史先是伊遜之孫沙爾布卒無嗣

命納都瑚并襲其一等輕車都尉遂由騎都尉晉三等男
復以叙前軍功及兩奉

恩詔晉爵三等子至是有

旨核議各官溫邀爵職改納都瑚為一等男兼一雲騎尉
十三年四月考滿廕一子入監十四年七月

上以都察院奏請更定世職襲例或有受囑徇私情事

召集院臣詰問副都御史能圖與納都瑚實先倡議並下

部論罪應削爵革任

命從寬降爵一等革副都御史仍理院事十五年正月援赦款復原官及所降之爵十七年卒

賜祭葬無子以鐘金之孫貴欽吉賽之子盧栢赫分襲貴欽襲一等輕車都尉盧栢赫襲二等輕車都尉合所襲吉賽之騎都尉晉一等輕車都尉魚一雲騎尉

瑪拉

瑪拉滿洲鑲白旗人姓納喇尚書尼堪從子也尼

堪卒無子瑪拉與叔阿穆爾圖阿錫圖及其弟兆資分襲尼堪二等子爵瑪拉襲三等輕車都尉初任理藩院筆帖式

世祖章皇帝順治五年逆鎮姜瓖叛英親王阿濟格帥師圍大同令瑪拉調蒙古兵隨征七年任戶部副理事官累遷理藩院郎中康熙十四年察哈爾布爾尼叛

聖祖仁皇帝命信郡王鄂扎帥師討之瑪拉自陳久任理

藩院習知蒙古情形願赴軍前効力遂奉

命與員外郎色稜赴科爾沁翁牛特巴林敖漢喀喇沁土
默特扎魯特諸部調選兵馬協剿凱旋擢通政使
十五年遷禮部侍郎十六年擢工部尚書十七年
同內大臣喀岱往科爾沁諸外藩宣

諭禁令先是瑪拉甫任尚書

上誠以工部弊端甚多宜盡心釐剔十九年四月

詔添給

陵寢匠作崔直令工部議行議自奉

詔之日始支給新定崔直

上詰瑪拉何不於議行奉

旨日始瑪拉謂已牒工所添給未便追扣

上以情節朦混下吏部都察院察議應降一級

諭責瑪拉不能清釐弊端回奏復巧飾

命降五級從寬留任二十年三月因

饗殿器用修造疎忽革尚書任仍留世職二十二年四月

上以俄羅斯數犯邊界擾害索倫及斐雅喀諸部

命集兵黑龍江為進征計

遣瑪拉往索倫預儲軍實並支部帑四千兩量買貨物携
赴軍前市易糧米牛羊瑪拉尋疏言索倫總管博
克等所獲俄羅斯人及軍前招降者皆迫於大兵
始投誠索倫密邇俄羅斯不宜久留應移之內地
事下部議行二十三年五月疏言雅克薩尼布楚二
城久為俄羅斯所據臣密詢情形雅克薩惟耕種

自給尼布楚人歲捕貂與喀爾喀貿易資以養贍
請

勅喀爾喀車臣漢禁止所部與尼布楚貿易並

勅黑龍江將軍水陸並進作攻取雅克薩狀因刈其田禾則
俄羅斯不久自困

上是其言即以瑪拉所奏檄知喀爾喀並以大軍將次進
勅傳示俄羅斯二十四年正月

詔遣都統朋春等師師往黑龍江策議進兵又

念瑪拉自遣用以來甚為奮勉且頗知雅克薩諸地形勢
特授副都統銜叅贊軍務三月瑪拉遣蒙古三十人往雅
克薩城生擒俄羅斯七人得城中設備及遣人乞
援各部狀逮送至京六月朋春等收復雅克薩城
大兵告捷瑪拉在事有功二十五年黑龍江佐領
鄂色以耕牛多斃農器損壞時近東作奏請儲備
命瑪拉往黑龍江督理農務

諭曰農事關係兵餉須令合力播種收穫豐稔著成效

二十七年授護軍統領二十九年

上以噶爾丹肆掠喀爾喀

命瑪拉同都統額赫訥前鋒統領碩鵠等率喀爾喀兵往
征噶爾丹

賜內廐馬以行未幾噶爾丹掠烏朱穆沁

上命裕親王福全等分統大兵協力會勦噶爾丹敗遁師
旋三十年正月噶爾丹復犯我喀爾喀至阿爾哈
齊地無所掠而遁時以土謝圖漢車臣漢率衆來

歸

駕幸喀爾喀撫綏之瑪拉扈從五月

駕回鑾

命瑪拉同都統瓦岱等率兵赴圖拉偵軍事七月抵克魯

倫聞噶爾丹遠遁遂旋軍九月

上以瑪拉才能素著於蒙古事亦諳練

特授西安將軍三十一年三月準噶爾和碩特部台吉巴

圖爾額爾克濟農來降

上因其人未可深信

諭瑪拉相機徙入內地毋致復逸瑪拉疏言巴圖爾額爾克濟農率所屬二千二百餘口窮乏來歸揆其情形不復逸矣遂遣員弁護送巴圖爾額爾克濟農及其子育木春來朝

上優賚遣之九月瑪拉以疾卒於任年六十有一

賜祭葬如典禮謚敏恪子瑪哈達襲三等輕車都尉世職
達克薩哈

達克薩哈姓賽密勒世居黑龍江曾祖塔馨塔

太祖高皇帝時來歸隸滿洲鑲白旗達克薩哈初為護軍

校隨征明錦州寧遠有功擢前鋒侍衛

世祖章皇帝順治六年睿親王多爾袞討叛鎮姜瓖以紅

衣馭攻渾源州城達克薩哈乘城毀處先登克之

十七年隨信郡王多尼征貴州明桂王朱由榔使

其將李定國白文選初三省實名望等分據要隘

大軍至永寧州初三省擁衆萬餘自雞公背迎戰

敗潰達克薩哈率本旗前鋒乘勝追擊至畢節縣
感之響水河橋斬級甚衆進攻七星關敗白文選
拒戰兵十六年大軍克雲南城朱由榔遁永昌分
軍追勦達克薩哈先驅至普朔挫其衆生擒十一
人抵玉龍關復擊敗白文選兵李定國潛設伏於
磨盤山犯我後軍達克薩哈返軍力戰敗之又同
前鋒統領白爾赫圖破其木柵擒斬實名望捷

聞賚白金裘馬十八年隨定西將軍愛星阿進剿朱由榔

至緬甸緬人執由榔以獻師旋叙功予騎都尉世

職

聖祖仁皇帝康熙十年授護軍叅領旋調前鋒叅領十三年隨信郡王鄂扎征察哈爾布爾尼師至達祿布爾尼伏兵二百從山谷間出突犯我師達克薩哈禦戰卻賊布爾尼旋整衆三千餘迎戰達克薩哈率八旗前鋒擊敗其中隊布爾尼復收合潰兵據山岡列火器以拒達克薩哈奮勇衝擊賊潰遁叙

功晉世職三等輕車都尉二十年擢鑲白旗蒙古副都統二十二年調本旗滿洲副都統尋以年老致仕二十四年卒

賜祭塋如典禮子達賴襲職

莽依圖

莽依圖滿洲鑲白旗人姓兆佳父武達禪

太宗文皇帝崇德三年隨睿親王多爾袞征明攻直隸任

邱山東濟陽並先登

賜號巴圖魯予騎都尉加一雲騎尉世職任太原城守尉
世祖章皇帝順治七年武達禪卒莽依圖襲職兩遇

恩詔晉世職至二等輕車都尉十五年隨征南將軍卓卜

特征明桂王朱由榔至貴州明年自都勻進師盤

江其晉王李定國據雙河口悉衆為三十營列象

陣拒戰莽依圖率步兵衝擊破之隨大軍定雲南

聖祖仁皇帝康熙二年隨靖西將軍穆哩瑪征湖廣流賊

李來亨等賊據茅麓山列寨拒守莽依圖冒矢石

進攻毀寨二賊大敗來亨自經死凱旋授江寧協
領十三年逆藩吳三桂陷湖南莽依圖隨征南將
軍尼雅翰率師進剿岳州用紅衣鰲擊沉賊舟敗
賊七里橋多斬馘十四年三桂遣賊將董重民結
廣西叛鎮馬雄犯廣東平南王尚可喜上疏請兵
詔尼雅翰率師至廣東莽依圖以署副都統駐守肇慶十
五年可喜子之信叛降三桂受偽爵倡兵作亂三
桂賊將范齊韓等逼肇慶總督金光祖降賊莽依

圖率所部兵突圍出且戰且走還駐江西偽將軍黃士標偽總兵黃割耳糾衆犯信豐莽依圖率兵往援與城內兵奮勇夾勦斬獲甚多賊遁走入山後追敗之圍遂解十六年三月實授江寧副都統時廣東尚為賊將董重民等所據

上命莽依圖為鎮南將軍率師規復以副都統額赫訥署副都統穆成額叅贊軍務四月自安康至南安偽將軍嚴自明以城降遂偕額赫訥穆成額率師進

征南雄偽將軍宋思政偽總兵郭茂威等迎降尚
之信亦擒董重民率藩屬及金光祖反正歸順莽
依圖進駐韶州五月疏言南安南雄韶州所屬文
武官弁昔雖迫於賊勢致污偽職今既望風款附
若悉事更張恐生反側請令暫留原任綏撫殘黎
上特允所請且

諭獎其進兵迅速六月

命翰林院侍講學士顧八代赴軍前傳

諭達剿逆賊擇便而行時賊將胡國柱馬寶糾賊萬餘犯
韶州莽依圖擊卻之九月賊復據河西斷我水運
餉道列營蓮花山以瞰城中會將軍額楚率江寧
兵至與城內軍夾擊破其四營斬獲甚衆賊敗竄
帽峯山我軍乘夜追擊大敗之河西賊亦遁水運
遂通十月追擊至樂昌賊據風門澳拒守我軍三
路仰攻別令瑤兵由間道奮擊擒斬賊二千餘乃
撫定仁化仍回駐韶州疏言將軍傅宏烈以五千

兵獨當西路恐力不支已遣副都統額赫訥赴梧
州協剿得

旨賊犯韶州將軍莽依圖同額楚夾剿既大敗賊衆復追
剿仁化諸縣指顧悉定可謂智勇兼擅凡為將者
統兵滅賊底定疆圉不必一一俱俟中旨惟應機
適變盡乃心力斯克副委任莽依圖當逆賊甫遁即遣
副都統額赫訥等往援粵西深可嘉尚十七年正
月三桂遣其孫吳世琮陷桂林馬寶亦由宜章陷

平樂

上命莽依圖赴廣西與傅宏烈會師剿賊二月疏言臣抵
平樂圍其城賊水陸拒阻宏烈所率綠旗兵與戰
不勝臣孤軍難以久留乃退駐中山鎮宏烈亦以
莽依圖所率滿洲兵不相應援入奏

上念擊賊失利因江水泛漲並免罪

諭令和衷協議剿滅逆賊莽依圖尋以賊逼賀縣退回梧

州乞罷將軍任

上切責之仍留任圖功贖罪明年二月吳世琮犯梧州莽
依圖同宏烈率師拒戰大敗之賊棄營遁先是
偽將軍馬承廕以南寧降至是賊由梧州敗竄糾
衆犯南寧六月城中食盡旦夕且陷莽依圖方卧
病聞之督師倍道援勦賊悉銳聚新村列鹿角西
山拒戰額楚額赫訥引前鋒兵擊之賊稍卻莽依
圖與將軍舒恕麾大軍進而預遣左翼兵潛出山
後截賊歸路盡殪之吳世琮負重傷以數十騎越

山道南寧圍解

上以廣西底定

命進取雲貴九月莽依圖以馬承蔭雖降心懷叵測恐為肘腋患上言湖南大兵在武岡禦賊臣等一軍先向雲南恐諸路兵不相應援且廣西新定若無兵駐守恐有他虞請暫駐南寧相機進剿

上命簡親王喇布鎮桂林莽依圖侯都統希佛兵至取路恢復疆土十九年四月授護軍統領五月馬承蔭

叛於柳州莽依圖率師進勦次來賓承廕驅象陣
逆戰我軍以勁弩射象回奔賊陣亂乘勝力戰賊
大敗棄甲走莽依圖自率輕騎追擊獲象三斬賊
甚衆會簡親王與總督金光祖分路勦賊並捷承
廕復降柳州平八月莽依圖卒於軍年四十有七
二十二年議政王大臣等追論莽依圖征廣西時
自平樂退梧州應坐失機籍家產半革去

恩詔所得騎都尉

上曰莽依圖在行間頗有勞績且屬下兵民俱稱其善凡所過地方亦不擾害百姓可免籍沒削去恩詔所加世職其原襲之騎都尉又一雲騎尉以其弟博和哩襲五十九年入祀廣西名宦

世宗憲皇帝雍正十年入祀賢良祠

今上乾隆元年追謚襄壯

瑚圖

瑚圖滿洲鑲白旗人姓洪鄂順治十二年以護軍

校隨寧南靖寇大將軍辰泰出師湖廣敗明桂王
將盧明臣馮雙禮於岳州武昌十七年隨安南將
軍洛託赴福建敗海賊鄭成功於廈門康熙二年
授駐防江寧協領八年擢江寧副都統十三年逆
藩耿精忠叛

上命瑚圖同副都統瑪哈達率所部赴杭州與將軍圖喇
計兵事尋以賚塔為平南將軍瑚圖叅其軍務八
月偽將軍馬九玉遣其將胡錦等犯衢州至石梁

瑚圖與副將王廷梅李承恩分路迎擊賊潰奔崖
山進圍之擒錦時賊黨小林別駐大溝源乘勝進
擊大敗之十月偽將馬四等率賊衆一由江山至
錢塘一由處州至林山謀犯衢州瑚圖分兵東西
夾攻陣斬偽將范安國王大頂等已而偽將周列
桑明率賊三萬屯焦園紅橋等處分路擊之連破
賊衆斬萬餘級十四年三月九玉擁衆屯衢州西
半夜渡水犯我營賚塔令瑚圖與廷梅往擊之敗

諸杭埠斬殺甚衆餘賊多溺死八月九玉遣其將李廷桂
率賊七千營於衢州北元口村設木城絕官軍糧道並據
東西山為聲援瑚圖分兵擊敗兩山賊夜衝賊營焚木
城賊敗遁十五年八月官軍破賊於大溪灘復江山縣
九玉走常山瑚圖追之賊拒戰又敗之進圍常山賊夜
開西門遁追至江西玉山界賊大潰斬獲無算復常山
縣進克仙霞關拔浦城精忠窮蹙詣康親王傑書軍門
降瑚圖隨軍駐福州十一月海逆鄭錦將徐耀率衆三

萬至烏龍江南營於石門枕峰諸山謀犯福州康親王
傑書遣瑚圖同總兵董大來夾擊破賊營十四賊遁追
四十餘里尋以瑚圖防守泉州十六年三月泉州城內
外土賊四起瑚圖遣將領水陸分剿盡殲之十月南安
縣賊陳式陳角等樹旗揚言欲犯泉州瑚圖令營長張
廷輔副將朱起龍分擊敗之斬陳角先是漳泉多寇南
安賊首李復貴同安賊首朱寅各據高山勾海逆乘機
剽掠康親王傑書令提督段應舉同瑚圖分路進剿擒

復貴及寅之偽軍師林日向等至是寅復犯陽坑
小黃山瑚圖與三等台吉查渾副都統鄔爾三路
追勦之殺賊千餘斬偽將謝良楊德瑚圖尋駐漳
州十七年二月海逆陷石瑪逼海澄瑚圖同海澄
公黃芳世副都統孟安應援敗賊於灣腰樹奪金
門山進至觀音山賊陳福陳仁來拒擊敗之賊奔
下澣追之斬偽將洪結賊收餘黨於石瑪築壘拒
官軍三月賊船二百餘乘潮至壘中賊復出列相

表裏瑚圖與芳世安令海澄總兵官黃藍潛師夾
攻陣斬偽將朱成高榮等十一人沉賊船九賊仍
遁入壘海澄圍解時官兵俱屯海澄石瑪漳州兵
少瑚圖同總督郎廷相晝夜防守忽海逆連舩數
百乘虛突犯入東關擊以礮賊敗退復益船擁衆
至且勾山賊蔡寅由天寶山斷我糧道瑚圖親督
戰焚其船賊仍不退閏三月芳世自海澄以兵來
援大破賊衆寅始遁去時海逆劉國軒吳淑等復

破海澄臨長泰糧道復阻賚塔令瑚圖帶甲八百
防守要路九月淑率賊萬餘逼漳城國軒營對河
為犄角城內兵少適副都統沃申率兵千餘來援
瑚圖隨賚塔分路勦至蔗林遇伏我兵小卻斬退
者三人兵奮遂破賊陣連拔其營十六殺賊過半
賊退據長泰謀犯南靖我兵分二隊進賊列營蜈
蚣山瑚圖同沃申力戰自辰至未賊大敗棄營走
斬賊將鄭英何觀衆四千餘復長泰賊退據江東

橋橋為漳泉往來要道十月賚塔營橋西令瑚圖
同沃申提督石調聲取橋東岸乃由長泰繞道越
朝天嶺過龍江口深入賊巢賊以礮迎敵瑚圖等
奮勇衝擊賊棄寨奔船據橋口急擊之賊奔出江
遂通漳泉路十八年二月賊設伏四山來誘我戰
瑚圖同大來副都統雅達里分兵突至山下伏
盡起瑚圖等力戰不退賊大敗奔據玉洲觀音山
各寨十月賊屯鰲頭山窺江東橋欲斷我路我兵

四路迎剿瑚圖與副都統瑪思文為一路擊敗之
十九年三月我兵分路剿賊瑚圖攻克玉洲各寨
賊戰敗竄廈門遂復海澄四月賊江欽等鳩賊踪
竄聚廣東達濠島瑚圖隨賚塔至潮州沿海督剿
水陸並進賊退乘勝取磊石門賊來爭復擊敗之
又遇我水師夾攻賊大潰遁出大洋尋閩粵平定
瑚圖回江寧任二十三年十一月

上南巡

駐蹕江寧

賜瑚圖蟒袍一十二月擢杭州將軍二十六年三月卒於

官得

旨瑚圖才品優長殫心盡職効力行間勞績茂著及授杭州將軍復能和輯兵民不干預地方事務行止清慎克盡厥職著從優議卹尋議祭葬如例

特旨加祭一次謚敏恪

欽定八旗通志卷一百六十八